



## Implementasaun Servisu Militar Obrigatoriu iha Timor-Leste

Mahein Nia Lian Nú. 149, 30 Outobru 2020



*Foto: F-FDTL*

Fundaasaun Mahein (FM)  
Website: [www.fundaasaunmahein.org](http://www.fundaasaunmahein.org)  
2020



## Kontiudu sira

Kontiudu sira	2
Introdusaun	3
Metodolojia	3
Realizasaun promesa sira kona-bá Servisu Militar Obrigatoriu	4
Programa VIII Governu nian ba Defeza Nasional	4
Servisu Militar Obrigatoriu sei baralla deit dezenvolvimentu F-FDTL	6
Servisu Militar Obrigatoriu hatodan despeza Estadu nian	7
Konkluzaan no rekomendasaun	7
Bibliografia	9

## Introdusaun

Tem i kona-bá implementasaun Servisu Militar Obrigatoriu iha Timor-Leste, la sees husi Primeiru-Ministru Taur Matan Ruak nia promesa iha kampania eleisaun prezidensial 2012 no parlamentar 2017 no 2018. Iha tinan 2012, bainhira kandidatu Taur Matan Ruak eleitu nu'udar Prezidente Repúblika, hahu dudu programa ne'e no estabelese ekipa ida ne'ebé lidera husi Casa Militar Prezidencia Repúblika nian hodi halo diskusaun. Maibe programa Militar Obrigatoriu labele implementa tamba la'os kompetênsia Prezidente Repúblika nian no la regula mos iha Lei ruma nomos programa Governu nian<sup>1</sup>.

Tamba programa ne'e sai tiha ona nu'udar mehi ida kleur Primeiru-Ministru Taur Matan Ruak nian desde tinan 2007, bainhira sei kaer hela Komandu FALINTIL-Força de Defesa de Timor-Leste (F-FDTL). Nune'e, iha tinan 2018 bainhira Taur Matan Ruak nomea ba Primeiru-Ministru VIII Governu Konstitusional, iha área defeza nian introdus kedas Servisu Militar Obrigatoriu iha programa Governu nian<sup>2</sup>.

Implementasaun Servisu Militar Obrigatoriu - tuir komunikadu imprensa Governu nian lora 28 Outobru 2020 VIII Governu Konstitusional ne'ebé lidera husi Primeiru-Ministru Taur Matan Ruak aprova Regulamentu foun kona-bá Lei Servisu Militar Obrigatoriu. Razaun hodi introdus Servisu Militar Obrigatoriu maka hodi responde ba nesesidade F-FDTL nian no polítika VIII Governu Konstitusional<sup>3</sup>.

Fundasaun Mahein (FM) kestiona programa ida ne'e tamba razaun sira tuir mai ne'e, *primeiru*, introdusaun Servisu Militar Obrigatoriu hodi realiza deit promesa sira iha kampania no mehi Primeiru-Ministru Taur Matan Ruak nian. Tamba razaun implementasaun Servisu Militar Obrigatoriu mikit liu no la ho estudu ruma. Segundu, implementasaun Servisu Militar Obrigatoriu sei baralla deit dezenvolvimentu F-FDTL duke responde ba nesesidade urjente sira F-FDTL nian. Terseiru, Servisu Militar Obrigatoriu sei hatodan deit despeza Estadu nian no sakrifika tiha investimentu ba setor produtivu sira.

## Metodolojia

Relatóriu ne'e nia análiza bazeia ba monitorizasaun FM nian kona-bá implementasaun polítika Governu nian ba asuntu sira defeza no seguransa no fontes informasaun sira husi relatóriu ofisial sira Governu nian. Nune'e hodi konklui relatóriu ne'e liu husi metodu ne'ebé FM adopta maka *Security Sector Discussion* (SSD). SSD hanesan diskusaun ne'ebé involve peskizador sira husi FM nian hodi diskute no análiza ba materia sira ne'ebé relasiona ho relatóriu ne'e nian no hamosu rekomendasaun sira.

---

<sup>1</sup> Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [http://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)

<sup>2</sup> Programa VIII Governu Konstitusional, 2018. Asesu iha ne'e: [http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN\\_CONSELHODMINISTROS200720181.pdf](http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf)

<sup>3</sup> Komunikadu Imprensa Sorumutuk Konsellu Ministrus nian iha lora 28 fulan-outobru tinan 2020. Asesu iha ne'e: <http://timor-leste.gov.tl/?p=26006&lang=tp>



## **Realizasaun promesa sira kona-bá Servisu Militar Obrigatoriu**

Servisu Militar Obrigatoriu fou-foun introdus iha Lei Servisu Militar nian ne'ebe aprova iha tinan 2007 (LEI N.º 3/2007 "LEI DO SERVIÇO MILITAR" de 28 de Fevereiro) no depois hetan alterasaun iha tinan 2008 (LEI N.º 16/2008 de 24 de Dezembro PRIMEIRA ALTERAÇÃO DA LEI DO SERVIÇO MILITAR) hodi aplika deit Rejime Voluntariu. Razaun sira ne'ebé iha tempu ne'eba hodi altera Lei ne'e tamba Servisu Militar Obrigatoriu sei obriga joven barak (idade produtivu sira) tama iha militar no ho despeza ne'ebé boot. Iha momentu aprovasaun LEI N.º 3/2007 "LEI DO SERVIÇO MILITAR" de 28 de Fevereiro, Major General Taur Matan Ruak nu'udar Chefe Estado Maior General (CEMG) F-FDTL nian.

Iha tinan 2012, Major General Taur Matan Ruak rejigna-an husi CEMG F-FDTL no kandidata-an ba Prezidente Repúblika, Militar Obrigatoriu sai mos hanesan programa prinsipal iha ninia kampania. Durante mandatu Prezidente Repúblika Taur Matan Ruak nian – hahu kedas diskusaun kona-bá Militar Obrigatoriu ho naran seluk Sidadaun Sivika no Patriota. Diskusaun ida ne'e, tempu ne'eba hetan protesta husi parte oin-oin ka la aseita ho introdusaun Servisu Militar Obrigatoriu iha Timor-Leste. Tamba setor sira seluk prioridade liu duke Militar Obrigatoriu. Razaun seluk, Prezidente Repúblika la iha kompetênsia atu implementa programa sira nune'e, tamba ne'e kompetênsia Governu nian. Diskusaun mos para – to'o Prezidente Repúblika Taur Matan Ruak nia mandatu ramata.

Iha tinan 2017 Taur Matan Ruak lidera Partidu Libertasaun Popular (PLP), iha kampania Eleisaun Parlamentar tinan 2017 no Eleisaun Antisipada 2018 – Militar Obrigatoriu fila-fali sai hanesan prioridade ida iha PLP nia programa. Tamba programa ne'e sai tiha ona nu'udar mehi ida kleur Primeiru-Ministru Taur Matan Ruak nian desde tinan 2007 no introdus iha Programa VIII Governu Konstitusional nian.

## **Programa VIII Governu nian ba Defeza Nasional**

Hanesan sita iha leten katak "implementasaun Servisu Militar Obrigatoriu hanesan mehi ida kleur Primeiru-Ministru Taur Matan Ruak desde tinan 2007". Iha tinan 2018 Taur Matan Ruak nomea ba Primeiru-Ministru VIII Governu Konstitusional nian – Servisu Militar Obrigatoriu introdus mos iha Programa Governu nian<sup>4</sup>. Nune'e ba asuntu Defeza Nasional nian nomea Vice-CEMG Brigadeiro General Filomeno Paixão ba Ministru Defeza hodi trata asuntu ne'e.

Iha Programa VIII Governu Konstitusional nian ba área defeza nian hatete "Governu sei promove servisu militar, nu'udar dever patriótiku no inkute iha profesionais setor ida ne'e

---

<sup>4</sup> Programa VIII Governu Konstitusional, 2018. Asesu iha ne'e: [http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN\\_CONSELHODMINISTROS200720181.pdf](http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf)



atu sai modelu ezemplar ba sidadania no integridade” nomos sei alkansa liu husi objetivu ida maka “promove estudu no reflesaun kona-bá obrigatoriedade ba servisu militar<sup>5</sup>”

Implementasaun ba programa ne'e, iha lideransa eis-CEMG F-FDTL Taur Matan Ruak hanesan Primeiru-Ministru no eis-Vice-CEMG F-FDTL Filomeno Paixão hanesan Ministru Defeza hahu uluk revogasaun ba Estatutu Militar F-FDTL nian (Decreto-Lei n.º 7/2014, de 12 de março, alterado pelo Decreto-Lei n.º 28/2016, de 13 de junho). Nune'e Estatutu Militar F-FDTL foun (DECRETO-LEI N.º 33 /2020 de 2 de Setembro NOVO ESTATUTO DOS MILITARES DAS FALINTIL-FORÇAS DE DEFESA DE TIMOR-LESTE) introdus mos Servisu Militar Obrigatoriu iha dekretu ne'e.

Implementasaun ba Estatutu Militar foun ne'ebé temi liu daudauk ne'e – Governu liu husi Ministru Defeza apresenta mos regulamentu kona-bá Servisu Militar Obrigatoriu ho forma dekretu-lei no aprova ona iha Konsellu-Ministru iha loron 28 Outobru 2020 no haruka ona ba Prezidente Repúblika estuda no promulga<sup>6</sup>.

Maske nune'e, programa ne'e la ho estudu ruma ne'ebé prova katak iha duni nesesidade ka lae atu implementa Servisu Militar Obrigatoriu iha Timor-Leste, hanesan temi iha Programa VIII Governu Konstitusional nian. Prespetiva estratéjika kona-bá polítika defeza nasional, iha exersísiu formulasaun polítika defeza Estadu ida nian, ameasa no interese estratéjiku maka determina estrutura forsa defeza nian. Tamba ne'e implementasaun ba programa sira nune'e, la'os bazeia deit mehi no promesa sira.

Bainhira Servisu Militar Obrigatoriu nu'udar ezekusaun ba asuntu sira ne'ebé identifika iha Konseitu Estratéjiku Defeza no Seguransa Nasional ne'ebé aprova iha tinan 2016<sup>7</sup>. Ida ne'e mos seidauk natoon – tamba Konseitu Estratéjiku Defeza no Seguransa Nasional la konstitui hanesan doutrina ba seguransa nasional. Portantu Konseitu Estratéjiku Defeza no Seguransa Nasional la mosu mesak-mesak deit bainhira seidauk iha Polítika Defeza Nasional no Polítika Seguransa Nasional. Iha ne'ebé Konseitu Estratéjiku Defeza no Seguransa Nasional ninia ezekusaun atu halo komprimentu ka hatan ba objetivu Polítika Defeza Nasional iha kuadru Polítika Seguransa Nasional nian. Maibe to'o agora Governu seidauk formula Polítika Seguransa Nasional no aktualiza Polítika Defeza Nasional.

Nune'e atu halo formulasaun ba Polítika Seguransa Nasional no Polítika Defeza Nasional, Governu presiza halo exersisiu boot ida ba Lei estruturante sira defeza no seguransa nian, liu-liu Lei N.º 2/2010 Lei Seguransa Nasional no Lei N.º 3/2010 Lei Defeza Nasional. Iha ne'ebé husi Lei rua ne'e hatudu ona dalan oinsa Governu formula Polítika Seguransa Nasional no Polítika Defeza Nasional. Nune'e Konseitu Estratéjiku Defeza no Seguransa Nasional ne'ebé sai hanesan baze ba implementasaun Servisu Militar Obrigatoriu, bele iha diresaun no objetivu ne'ebé klaru. Tamba Polítika Seguransa Nasional no Polítika

---

<sup>5</sup> Programa VIII Governu Konstitusional, 2018. Asesu iha ne'e: [http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN\\_CONSELHODMINISTROS200720181.pdf](http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf)

<sup>6</sup> Komunikadu Imprensa Sorumutuk Konsellu Ministrus nian iha loron 28 fulan-outubru tinan 2020. Asesu iha ne'e: <http://timor-leste.gov.tl/?p=26006&lang=tp>

<sup>7</sup> RESOLUÇÃO DO GOVERNO N.º 43/2016 de 14 de Dezembro. APROVA O CONCEITO ESTRATÉGICO DE DEFESA E SEGURANÇA NACIONAL



Defeza Nasional maka fó klaru oinsa Governu dezenvolve no determina estrutura forsa defeza nian. Nune'e bele iha koerensia ba polítika nasional ba seguransa no defeza nian.

### **Servisu Militar Obrigatoriu sei baralla deit dezenvolvimentu F-FDTL**

Governu argumenta katak Servisu Militar Obrigatoriu “hodi hatan ba nesesidade militar nian” ka F-FDTL. Maibe argumentu ida ne'e dook tebes husi realidade F-FDTL nian. Hanesan mos Planu Força 2020 (Estudu Força 2020) ne'ebé expire daudauk ona. Iha ambisaun ne'ebé a'as maibe la realistiku no kontestual, ikus mai dokumentu mahar ida ne'e la konsege implementa. Mesmu Ministériu Defeza estabelese Gabinete Força 2020 hodi tau matan ba ninia implementasaun maibe orsamentu la suficiente hodi realiza mehi a'as ne'ebé hatuur iha dokumentu ne'e.

Nune'e mos Servisu Militar Obrigatoriu sei baralla deit dezenvolvimentu F-FDTL nian. Tamba kondisaun F-FDTL nian hanesan infraestrutura, fasilidade no ekipmentu sira sei dook husi “suficiente” hodi akomoda joven sira ne'ebé ho idade 18 ba leten hodi kumpri Servisu Militar Obrigatoriu. Tamba ne'e Governu fó prioridade ba revizaun Planu Força 2020 hodi estabelese postura forsa defeza ida ne'ebé realistiku no kontestual. Iha disiplina formulasaun polítika defeza nian, iha buat prinsipál tolu; interese estratéjiku, postura forsa no aliñamentu planu forsa ho kbiit finanseiru Estadu nian. Atu formula polítika defeza ida koerente no klaru, presiza interaksaun diak entre fator tolu ne'e<sup>8</sup>.

Razaun seluk ne'ebé Governu argumenta “Servisu Militar Obrigatoriu sei forma joven sira disiplina no patriota”. Ne'e bele los. Iha militar hanorin duni buat ida disiplina; tenke pontual no disiplina hodi ezekuta orden husi komandante sira. Atu kuda buat sira ne'e iha ema ida nia kakutak, la'os tenke liu deit husi Servisu Militar Obrigatóriu, buat sira nune'e bele hadia kedas deit husi familia uma-laran, eskola no iha comunidade. Atu muda mentalidade ema ida nian la'os akontese deit iha tinan rua ka tolu nia laran depende ba durasaun Serbisu Militar Obrigatóriu nian, maibe ne'e presiza tempu naruk hahu husi inísiu kedas bainhira ema ne'e se iha inan nia kabun-laran to'o idade boot no moris iha comunidade nia laran. Disiplina militar nian obriga forsa sira hodi hatan “prontu” ka babain krítika sira dehan *blind obedience to commands* ba kualker instrusaun sadeit maka mai husi sira-nia superior. Iha mundu la'os militar nian, no tuir formasaun ema ne'ebé lolos hanorin ema atu disiplina maibe iha espasu mos ba argumentasaun ka rasionalizasaun. Ne'e hamosu ona kestaun kona-bá oinsa bele kuda disiplina maibe la hamate jogu kakutak iha argumentasaun ka rasionalizasaun nian? Iha ne'e la'os atu dehan mundu militar nian ne'e la rasional, maibe, aproximasaun militar nune'e bele mos lori impaktu ba foin-sa'e sira ne'e hodi re-integra ba comunidade hafoin hala'o tiha Servisu Militar Obrigatóriu<sup>9</sup>.

<sup>8</sup> Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [http://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)

<sup>9</sup> Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [http://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)

## Servisu Militar Obrigatoriu hatodan despeza Estadu nian

Program Servisu Militar Obrigatoriu ne'e hatodan deit despeza Estadu nian no sei la sustentavel. Iha disiplina formulasaun polítika defeza nian, iha buat prinsipal tolu; interese estratéjiku, postura forsa no aliñamentu planu forsa ho kbiit finanseiru Estadu nian. Atu formula polítika defeza ida koerente no klaru, presiza interaksaun diak entre fator tolu ne'e<sup>10</sup>.

Iha kontektu Timor-Leste, susar tebe-tebes, karik la'os imposível, atu Estadu ne'e bele sustenta estrutura forsa defeza ida ne'ebé mai husi obrigatoriu. Molok atu tara mehi ne'e aas liu, presiza kompriende situasaun atual. Ohin-loron, iha problema barak no oin-oin iha esforsu dezenvolvimentu F-FDTL atu sai forsa ida ne'ebé professional no konvensional liu-liu problema orsamentu. Ezemplu, iha tinan 2020, orsamentu ba setor defeza no seguransa iha deit 6% (Ministériu Defeza no F-FDTL, Interior no PNTL, no seguransa sira seluk), no F-FDTL rasik mais-menus 2%. Kompara ho Singapura ne'ebé aplika mos Servisu Militar Obrigatóriu gasta 1/4 husi total despeza Estadu kada-tinan ba setor defeza. Singapura sai nu'udar nasaun vensedor daruak kona-bá nível gastu iha defeza hafoin Israel<sup>11</sup>.

Iha nasaun kiak sira, bainhira defeza boot bele lori impaktu negativu ba dezenvolvimentu setor prinsipal sira seluk hanesan saúde no edukasaun. Iha ona debate iha nasaun ne'ebé aplika programa ne'e atu halakon tiha programa ne'e tan hasa'e deit despeza Estadu nian. Imposível atu kompara situasaun dezenvolvimentu Timor-Leste ho Singapura ne'ebé avansadu liu ona iha setor hotu-hotu. Tan ne'e, presiza defini programa ida ne'ebé realístiku ho situasaun real Timor-Leste nian<sup>12</sup>.

## Konkluzau

Implementasaun Servisu Militar Obrigatoriu iha Programa VIII Konstitusional nian nu'udar mehi ida kleur ona husi atual Primeiru-Ministru Taur Matan nian desde tinan 2007 no iha kampania prezidencia no parlamentar liu ba. Maske nune'e, programa ne'e la ho estudu ruma ne'ebé prova katak iha duni nesesidade ka lae atu implementa Servisu Militar Obrigatoriu iha Timor-Leste. Husi prespetiva estratéjika kona-bá polítika defeza nasional, iha exersísiu formulasaun polítika defeza Estadu ida nian, ameasa no interese estratéjiku maka determina estrutura forsa defeza nian. Tamba ne'e implementasaun ba programa sira nune'e, la'os bazeia deit mehi no promesa sira.

Nune'e implementasaun Servisu Militar Obrigatoriu iha Timor-Leste sei baralla deit dezenvolvimentu F-FDTL nian no sakrifika mos setor produtivu sira seluk ne'ebé

---

<sup>10</sup> Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [https://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](https://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)

<sup>11</sup> GLOBAL MILITARISATION INDEX 2019. Asesu iha ne'e: [https://www.bicc.de/uploads/tx\\_bicctools/BICC\\_GMI\\_2019\\_EN.pdf](https://www.bicc.de/uploads/tx_bicctools/BICC_GMI_2019_EN.pdf)

<sup>12</sup> Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [https://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](https://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)



prioridade liu duke Servisu Militar Obrigatoriu. Programa ida ne'e mos sei hatodan deit despeza Estadu nian.

Iha kontestu Timor-Leste, susar tebe-tebes, karik la'os imposível, atu Estadu ne'e bele sustenta estrutura forsa defeza ida ne'ebé mai husi obrigatóriu. Molok atu tara mehi ne'e aas liu, presiza kompriende situasaun atual. Ohin-loron, iha problema barak no oin-oin iha esforsu dezenvolvimentu F-FDTL atu sai forsa ida ne'ebé profesional no konvensional liu-liu problema orsamentu.

Nune'e FM rekomenda:

1. Governu liu husi Ministru Defeza fó prioridade ba revizaun ba Planu Força 2020 hodi estabelese postura forsa defeza ida ne'ebé realistiku no kontestual. Duke Servisu Militar Obrigatoriu ne'ebé halo baralla deit setor defeza nian no hatodan mos despeza Estadu nian;
2. Rekomenda ba Prezidente Repúblika Veta Regulamentu foun ba Servisu Militar Obrigatoriu ne'ebé Governu apresenta. Tamba setor produtivu sira prioridade liu duke Servisu Militar Obrigatoriu ne'ebé la ho estudu ruma no bazeia deit ba promesa polítika sira no mukit iha razaun sira hodi dudu programa ne'e.





## Bibliografia

DECRETO-LEI N.º 33 /2020 de 2 de Setembro NOVO ESTATUTO DOS MILITARES DAS FALINTIL-FORÇAS DE DEFESA DE TIMOR-LESTE

Decreto-Lei n.º 7/2014, de 12 de março, alterado pelo Decreto-Lei n.º 28/2016, de 13 de junho

GLOBAL MILITARISATION INDEX 2019. Asesu iha ne'e: [https://www.bicc.de/uploads/tx\\_bicctools/BICC\\_GMI\\_2019\\_EN.pdf](https://www.bicc.de/uploads/tx_bicctools/BICC_GMI_2019_EN.pdf)

Komunikadu Imprensa Sorumutuk Konsellu Ministrus nian iha lora 28 fulan-outubru tinan 2020. Asesu iha ne'e: <http://timor-leste.gov.tl/?p=26006&lang=tp>

Lei N.º 2/2010 Lei Seguransa Nasional

Lei N.º 3/2010 Lei Defeza Nasional

LEI N.º 16/2008 de 24 de Dezembro PRIMEIRA ALTERAÇÃO DA LEI DO SERVIÇO MILITAR

LEI N.º 3/2007 "LEI DO SERVIÇO MILITAR" de 28 de Fevereiro

Planu Força 2020

Programa VIII Governu Konstitusional, 2018. Asesu iha ne'e: [http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN\\_CONSELHODMINISTROS200720181.pdf](http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf)

RESOLUÇÃO DO GOVERNO N.º 43/2016 de 14 de Dezembro. APROVA O CONCEITO ESTRATÉGICO DE DEFESA E SEGURANÇA NACIONAL

Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: [http://www.fundasaunmahein.org/wp-content/uploads/2013/05/MNL\\_Nu.-53\\_27052013\\_Militar-Obrigatoriupdf.pdf](http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf)